



Il director Ueli Rehsteiner (a dretg) ed il pedagog Flurin Camenisch: «Ina schelta da 150 or da 370000 objects dovra in bun teamwork.» FOTO LIVIA MAUERHOFER

150 onns cun 150 objects ed ina finamira

Il Museum da la natira dal Grischun festivescha quest onn ses 150avel onn d'existenza. Cun quest'ocasiun organischa il museum ina exposiziun da giubileum cun 150 objects or da las atgnas collecziuns. Ier saira è l'exposiziun intitulada «La natira sco stgazi» vegnida averta.

MARTIN GABRIEL/ FMR

La fundaziun dal Museum da la natira dal Grischun stat en in connex fitg stretg cun la Societad grischuna per la perscrutaziun da la natira (SGN) ch'è vegnida fundada l'onn 1825. Insaquants commembers da la SGN che eran magisters a la scola chantunala grischuna èn s'engaschads per l'instrucziun dals roms da las ciencias naturalas. Els avevan atgnas collecziuns d'animals, plantas, minerals e crappa ch'els duvravan era per la scola. Plirs decennis han ils magisters stuì insister ed argumentar per in museum e ch'ins possia mussar tut quellas collecziuns a la publicitad. L'onn 1872 èsi stà uschè lunsch: Il Museum grischun per scienza ed art è vegnì avert en la chasa Buol a Cuira, l'actual Museum retic. Per entant è il Museum da la natira stà ina partiziun d'istorgia natirala dal Museum retic. Il Museum da la natira en l'edifizi dad oz è vegnì avert l'onn 1981. Cumentà ha tut cun in collavuratur en ina piazza

parziala. Oz ha il Museum da la natira circa 30 collavuraturas e collavuratur ed en tut circa 370 000 objects da collecziun.

Istorgia variada, activitads multifaras

Il directur actual dal Museum da la natira dal Grischun, *Ueli Rehsteiner*, ed il pedagog da museum, *Flurin Camenisch* han ditg che las activitads actualas dal museum stettian sin quatter pitgas: collecziunar, conservar, intermediar e perscrutar. Tenor questas quatter pitgas è era l'exposiziun da giubileum «La natira sco stgazi» concepida. Cun ils dus parameters da las quatter pitgas tematicas ed ils 150 objects han ins tenor Flurin Camenisch fatg la schelta d'objects. «L'exposiziun dat respostas a dumondas sco: Tge impurtanza han collecziuns per intermediar e per perscrutar? Tenor tge criteris collecziunescha il Museum da la natira dal Grischun e co vegnan objects da collecziun conservads per tschientaners?» Per il directur Ueli Rehsteiner èsi per sumeglia impurtant

ch'ins possia exponer l'urs da glatsch ch'è a ses temp stà en possess dal Museum da la natira dal Grischun fin l'onn 1980 che l'urs da glatsch è vegnì consegnà al Museum zoologic da l'universitad da Turitg.

Program da giubileum voluminus

«Il Museum da la natira dal Grischun è dapi sia fundaziun in construir da punts tranter la natira, respectivamain la scienza natirala e la populaziun», ha il directur dal museum, Ueli Rehsteiner ditg durant la guida. «Noss Museum da la natira ha adina gì il ferm sustegn dal chantun e da la citad da Cuira, ma era da la SGN, dad auters museums, dal Parc Naziunal Svizzer e dad autras instituziuns publicas e privatas. Perquai datti en quest program accompagnant da giubileum sper visitas guidadas e referats er occurrenzas communablas cun organizaziuns partenarias e pliras excursiuns. L'exposiziun da giubileum cuzza fin ils 23 da schaner 2023.»